

**Batwa nii sagi tə,
Zwan
nə púpúní
Zwan batwa nii sagi tə yuu
wa sɔɡv**

Liù tə, v nə púpúní sagi kv tə

Lià zənzən buŋa də, kv yɪ *tuntɔnɔ Zwan nə púpúní kv. Zwan tə, v nə púpúní saga bələ tə duən tə, mə v mù nə púpúní kv tə də. U yà boŋə v tìàn «nəkwiə».

Liù tə nə, Zwan nə púpúní

Zwan púpúní sagi kv tə, v pa liù don nə, ba nə boŋə Gayisə.

Sagi tə wa sɔɡv

U púpúní kv, v ma bu Gayisə nə, v nə twá Yɪ cígá tə nə, v ga saŋa *Kərisə lià tə nə yɪɪ. Kv kwa nə, v swìn bæɛ don yoo, ba nə boŋə Diyotərəfə. U bɪɪ də, bæɛ təntə wà zəni fwa, v nə wà v sɔɡv tə jon, v ga wà sèe v pa, Kərisə lià tə zɪɪ v diə wa yɪɪ.

Kv mù təntə də kwa nə, v kúv b̀̀à liù don də nə, ba nə boŋə Demetəriyisə. U mù bæɛ təntə yɪ ləzwənzəŋu, v ga ya cígá tíú lià tə mama yáá con.

Zwan j̀̀ǹ̀ Gayisə

¹ À mù *nəkwiə tə nə púpúní sagi kv tə, à pɪn n mù Gayisə nə. N yɪ liù tə, n yoo nə cà à nə

zənzən, à ga swə mú də cígá cígá sonu də. ² À nubiswənə tə, à ylori nə ya, sə won mama kwen ku pa mú, sə n yazurə də ya zəni, sə n ga twá Zwezi-*Kərisə nə zəni.

Gayisə zílí Yı cígá tə nii zəni
(*Matíə 10.40-42*)

³ À pùé poli zənzən, máǵá tə wa, *Kərisə là duən nə twi nə con, ba swìn n yoo də, nətu tə, n nə yèé Yı cígá tə. Ba bırı, nətu n nə zílí Yı cígá tə nii. ⁴ À ba pupwən don jə ka nə kúð dwə, à nə nì də, ba swìn də, à bia tə zílí Yı cígá tə nii. ⁵ À nubiswənə tə, n yı liù tə, n nə fwa zəni là tə yira, ba nə yı nubia Kərisə yıri, ba nə yı vərə tətə. Ku nətu bırı də, n twá *Yuu-Tiu nə də pùé nədu. ⁶ Ba swìn n sonu tə yoo, ba bırı Kərisə là púlí tə yáá con. À lòrì mú, sə n san ba, sə ba wàní ba kèéń, ba va ba cwəǵə tə. Fwa nətu, sə ku pa dun Yı nə. ⁷ Ku ya ba nan, sə ba swìn Yuu-Tiu yıri tə yoo ba bırı. Yá ba ga wà won mama jon là tə con, ba nə yèrì Zwezi-Kərisə. ⁸ Nə mù Kərisə là tə dàń nə mə, sə nə san ba mù là təntə nə, sə ku pa, nə mù də ba mù mə ya tütònà Yı cígá tə yıri.

Diyotərəfə də Demetəriyisə yoo
(*Likə 20.46-47; 1 Korəntə tián 4.18-21; 1 Piyerə 2.12*)

⁹ À púpúní sagı kukuə, à pa *Kərisə là púlí tə nə. Yá Diyotərəfə, v nə swə, sə v ya ba yáá tíú tə, vıga, sə v zílí nə nii. ¹⁰ Ku mù nə pın, máǵá tə wa, à nə wá bà, à wá líí aba tütönkükwınan tə, v nə tuǵa. À wá líí aba sùràn tə, də kunkun

tə də, ʋ nə kɔnɪ ʋ kəni nə nii nə. Yá də ʋ nə fwa nɛtʋ tə mama, kʋ tə wà ʋ fɪra yí. Kʋ m̀ nə pɪn, ʋ dān vɪ, sə ʋ jon là tə duən tə, ba nə yɪ nubɪa Kərisə yɪrɪ, ba nə twi á con, ʋ kə ʋ diè wa. Nubɪa tə duən nə pìà ba jon ba, ba kə ba diè wa, ʋ yáá caga ba nii nə. Yá ʋ ga dɪŋɪ ba m̀ là tɛntə, ba nə pìà ba jon ba, ʋ lɪ Kərisə là púlí tə wa.

¹¹ À nubiswənə, n m̀ dān ká twá n kwè yolwan fàŋú. N mɛ, sə n kwè, kʋ tə nə zɪən fàŋú. Liù tə, ʋ nə fwa zəni, ʋ ya Yɪ nə tɪ wá. Yá liù tə, ʋ nə fwa yolwan, ʋ yèrɪ Yɪ tətə.

¹² Ba mama swìn Demetəriyisə zəni tə yoo. Yá Yɪ cígá tə də tətə bɪrɪ ʋ zəni tə. Nə də swìn ʋ zəni tə yoo nə bɪrɪ. Yá kʋ tə, nə nə swìn tə yɪ cígá.

Sagɪ tə yígúré s̀r̀àn

¹³ À jə yìèn zənzən, à nə pìà, sə à swìn n con. Yá à ga ba pìà, sə à púpúní tə sagɪ wa də púpúná mɪa. ¹⁴ À bɪŋa də, à wá na mú síún, sə nə swìn duən con də níé.

¹⁵ Yɪ nə wá pa mú bɪcan sié. N dabara tə də jònè mú. Vəli nə dabara tə liù mama con, n jon wá n pa nəba.

Yu soywánó sagı
Nuni, Southern: Yu soywánó sagı New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 30 Sep 2022 from source
files dated 8 Feb 2022

d18530a7-7259-5f23-92b6-70e3abe5f3fa